

佛说耶祇经 1 卷

No. 542

佛说耶祇经

宋居士沮渠京声译

闻如是：

一时，佛在迦奈国。国中有婆罗门大富，姓名耶祇，本事九十六种外道，以求福佑。闻人事佛，得富贵长寿安隐，度脱生死受福，不入三恶道中，不更勤苦。耶祇自念：「我不如舍置外道，当奉事佛。」因诣佛所，以头面着地，为佛作礼，长跪白佛言：「我本愚痴，无所识知，窃闻佛道恢弘大慈普济，佛天上天下人中之尊，无不安隐者。我今欲舍置所事外道，归命于佛，愿佛哀我，当受教诫。」

佛言：「若今所言大善，熟自思之而止恶为善者，何忧不得安隐？」

耶祇白佛言：「今以我所事非真故，归命于佛，当哀愍我曹，去浊秽之行，受佛清净决言，若审尔者大善。」耶祇便前受五戒：一、不杀生；二者、不盗；三者、不淫；四者、不两舌恶口妄言绮语；五不、饮酒。三自归已，起绕佛三匝，持斋七日而去。

自是之后，行到他国，见人杀生射猎，盗人财物，耶祇便欲随之；见好色女人，心意贪之；见入是不是，便论道之；见人饮酒醉乱，便欲追之，心不安定，更欲悔之，自念：「我不能事是佛法，终当还佛五戒。」

即诣佛所，叩头白佛言：「我前从佛受五戒，多所禁害，不得从我本意，今自思惟欲罢，不能事佛。佛法尊重，非我所能奉事，当可得还五戒不？于佛意当可尔不？」

佛默然不应，言未绝口中，便有自然鬼神，持铁椎，击耶祇头破之；复有鬼神，解脱其衣；复有鬼神，以铁钩就口中，移取其舌。有淫女鬼神，以刀深割其阴；有鬼神，洋铜沃其口中；前后左右，皆诸鬼神，竞来分裂其肉。如是耶祇，眼目臭咤，面如土色，自然之火烧其身，求生不得，求死不得，鬼神持之甚急。

佛见之如是，哀愍念之，因问耶祇：「汝今者当云何？」

耶祇口噤不能复语，但举手自搏，从佛求哀。佛便放威神，鬼神皆怖而走。耶祇便得稣息，更起叩头，前白佛言：「我心中有是五贼，牵我入恶罪中，出是恶言，今受其罪。自我所为违负佛言，愿佛哀我。」

佛言：「自汝心口所为，当咎阿谁？」

耶祇白佛言：「从今日以往，当自改更奉持五戒，岁三斋、月六斋，烧香燃灯，供奉三尊，身口意不敢复犯。」

佛言：「如是，大善！自若眼目所见，身体所更，自作自得，作善得善，心念不善得不善。佛者法中之师，教人去恶为善，后长得度脱，诸天及人民，愚痴者，皆使智慧，不更勤苦。从今已往，改更修善，莫得听心意所为误人之本。」

佛说经已，耶祇心意开解，即得须陀洹道，欢喜而去。

耶祇归家，即勅舍中，大小皆诣佛所受五戒，岁三斋、月六斋。耶祇便舍家，剃头须被袈裟，从佛作沙门，遂得阿罗汉道。

佛说耶祇经

【经文信息】大正藏第 14 册 No. 0542 佛说耶祇经

【版本记录】CBETA 电子佛典 Rev. 1.10 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，阎学新大德输入 / 沈介盘大德校对，北美某大德提供，CBETA 自行扫描辨识，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

